



QUÆSTIO MEDICA,

QUOD LIBETARIIS DISPUTATIONIBUS,
manè discutienda, in Scholis Medicorum,
die Jovis vigesimâ-sexâ Maii.

M. JOANNE POISSON, Doctore
Medico, Præsîde.

An Amor ingenium mutat?

I.



MORIS & mundi idem initium, non finis, non
fors eadem; in dies marcescit & senescit mundus,
semper florescit & juvenescit amor: mundus se-
nescens rerum naturæ series & ordo; senilis seu
effectus amor monstrum & naturæ horror. Non
paucorum sed penè omnium hominum passio est, amor *φιλο-
τητι μίχης*. Non in solo pulchritudinis amatae aspectu quiescit,
rapitur ulterius, incidat in centrum donec amoris, Amor. Quid
enim est Amor, nisi vita quædam quâ copulatur quod amat,
& quod amatur. Hinc rerum omnium ortus; Hinc commif-
cendorum corporum miræ libidines; hinc innumeri conjuges,
cælibes pauci: quis enim modus adsit amori. Dulce malum
amor est, illud damnare facilius, quam vitare. Cave ne amens
sis, si non ames; Si quem amentem amor fecit, non amoris
est culpa, sed amantis, qui amare nescivit: arte leves currus,
arte & remo reguntur citæ rates, arte regendus amor.

ANIMÆ perceptio cum sanguinis & spirituum agitatione conjuncta, passio dicitur. Perceptio non à corpore, non in corpore, sed in animâ. Quædam est cogitationis species, ideòque spiritalis animæ actio; non tamen sine Corporis Commotione suscitata, quamdiu anima corpore conclusa est. Commotio, perceptionis occasio, non causa. Sanguinis & spirituum motus qui mentis cogitationem sequitur, totus est in corpore, totus fit per corpus, non sine mentis imperio, quod motus occasio non causa: sola perceptionis animæ, & corporis motus causa, est lex ab authore Naturæ tum sancita, cum animum unâ cum corpore conjunxit, ut videlicet quasdam animi cogitationes, certi corporis motus, & vice versâ, quasdam corporis motiones certæ mentis perceptiones excipiant.

III.

ANIMA unita corpori, ab ipsius, inter operandum, pendet organis. His benè aut malè dispositis, benè aut male operatur anima; ita æterno fœdere sancivit qui animam corpori immiscuit. Quò mobiliiores, puriores, & uberiores spiritus, eò vegetiores sensus, eò vividiores mentis perceptiones. Ad sensuum & spirituum exquisitam perfectionem conferunt principiorum sanguinis æquabilis, & proportionata ad se invicem mixtio; certus, constans, & vividus cordis motus; *ἐὐχρίστη* ciborum laudabilis concoctio; tempestiva impuritatum secretio, & evacuatio. Hæc bona, si quid maxime, trahit secum Amor, corporis & animæ motus versus convenientia objecta. Huic *σύνδυτος*; Illi à spirituum & sanguinis agitatione *εἰσπομπός*. Si quid jucundum & delectabile mentem feriat, hæc illicò amoris & voluptatis vim magnam sentit, tunc undiquè selecti spiritus in certos nervorum tubulos impulsæ ad cor rapi-

dius deferuntur, augetur pulsus, celerius venæ moventur, velocius fiunt sanguinis accessus & recessus, ipsiusque principia liberius evoluuntur, & magis ac magis exaltantur. Protinus ubique torpidi excitantur spiritus, cerebri meatus expanduntur, effusis hinc & hinc spiritibus, distinctæ & lucidæ rerum species menti occurrant, rubet, nitetque facies, micant oculi, blando calore corpus incalescit: Crescit vigor in partibus illis quas pudor abscondit.

I V.

QUÆRANT quod amare velint hebetes pulli orti ovis infelicibus; reperire laborent, quod ament stolidi, nati vervecum in patriâ, crassoque ex sanguine; si brevi tempore duraverit amor, mox sentient vim Dei diffundi venis; noxia menti corporis vitia vincet amor, cujus ope, & molli igne, levata & quasi animata quæ corpus regit natura concoquet, quod concoqui est habile, excernet quod debet excerni, exonerataque eo onere quo veluti sarcinâ premitur, dabit sanguini tenuitatem, & fluiditatem; spiritibus mobilitatem, & celeritatem; sensibus divitem & ingeniosam subtilitatem. Langueat ferè moritura virgo hysterica, vivet illa, virides nec deferet annos si vocet amorem, tanti maximum artificem morbi; Amori cedent oris pallor, virium & animi demissio, corporis & animi stupor, thoracis angustia, suffocatio, iracundia, Inquietudo, metus, & horror. O Medicina gravis! Amorem animi affectuum primum, si tollas *μυστήριον*, perire omnes vitæ illecebræ, extincti jacent nostri & sine luce dies. Amore quasi connubio stabili, anima corpori conjuncta ipsius bonorum ut malorum consors fidelis; afflicto Corpori compatitur, quidquid clament & obganniant *οἱ ἐν τῷ σώματι βάττονται*, illo sanato juvatur simul, & convalescit.

AMOREM oderunt & damnant qui non amant. Animæ motiones ex se nec bonæ, nec malæ; si ratione reguntur, & intrâ modum steterint, laudem merentur; si libidine, & modum excefferint vituperium. Eas rejicere, ignorare est earum usum & finem; illas ne dixeris perturbationes animorum, sed exercitationes, sine quibus animi torpescerent & languescerent; ut labor firmat corpus sic passionēs animos, ut ignavia corpus hebetat, sic ἀπαθεία animos. Amor Chao & terræ congenitus pulcherrimus inter Deos immortales λυσιμελής, Deorum & hominum domat pectora, & regit consilia. Non morbus est ille; sed amabilis medela vitiorum penè omnium, Nepenthes est illa Homericæ, pacificum illud Pharmacum oblivionem malorum omnium inducens. Adeò homines in melius immutat Amor, ut non noscas eundem hominem esse. Amore homines ex tristibus fiunt lepidi, ex ferocibus mites, ex stupidis ingeniosi & πολύτροποι, ex indifertis disertis, ex ignavis fortes, ex sordidis & avaris liberales. Amore senes Capulares adulescunt, & repuerascunt; fel quod amarum est, Amore mel fiet. Hæc amoris præmia non novit, qui amorem non novit.

Ergo Amor ingenium mutat.

Domini Doctores disputaturi.

M. Philippus Ignatius Sæve.

M. Petrus Marais, rei herbaria Professor.

M. Dionysius Pizylen.

M. Petrus-Joannes Burette

M. Carolus Contugi.

M. Raphaël Maurin.

M. Ludovicus de Vaux.

M. Franciscus Vernage.

M. Petrus Cressé.

Proponēbat Parisiis JOANNES GAILLARD, Castro-Censorius
Nivernensis, Baccalaureus Medicus. A. R. S. H. 1695.

Apud Franciscum Muguet, Regis & Facultatis Medicinæ Typographum.